

## Kantonalno tužilaštvo Unsko-sanskog kantona

Ovo Tužilaštvo podiglo je dana 30.11.2011. godine optužnicu koja je potvrđena od strane Kantonalnog suda u Bihaću, dana 6.12.2011. godine, protiv:

1. T. J., ostali podaci u spisu, trenutno se nalazi u pritvoru u KPZ Poluotvorenog tipa Bihać po rješenju Kantonalnog suda u Bihaću br. 01 0 K 006076 11 Kpp 2 od 16.09.2011 godine pritvor po tom rješenju počinje teći od 15.09.2011 od 05,50 sati.
2. T. Z., ostali podaci u spisu, trenutno se nalazi u pritvoru u KPZ Poluotvorenog tipa Bihać po rješenju Kantonalnog suda u Bihaću br. 01 0 K 006076 11 Kpp 2 od 16.09.2011 godine pritvor po tom rješenju počinje teći od 15.09.2011 od 05,45 sati.
3. B. Z., ostali podaci u spisu, trenutno se nalazi u pritvoru u KPZ Poluotvorenog tipa Bihać po rješenju Kantonalnog suda u Bihaću br. 01 0 K 006076 11 Kpp 2 od 16.09.2011 godine pritvor po tom rješenju počinje teći od 15.09.2011 od 06,35 sati.
4. B. Ž., ostali podaci u spisu, trenutno se nalazi u pritvoru u KPZ Poluotvorenog tipa Bihać po rješenju Kantonalnog suda u Bihaću br. 01 0 K 006076 11 Kpp -6 od 30.09.2011 godine, pritvor po tom rješenju počinje teći od 29.09.2011 od 08,40 sati.
5. M. G., ostali podaci u spisu, trenutno se nalazi u pritvoru u KPZ Poluotvorenog tipa Bihać po rješenju Kantonalnog suda u Bihaću br. 01 0 K 006076 11 Kpp - 13 od 11.11.2011 godine, pritvor po tom rješenju počinje teći od 10.11.2011 od 05,45 sati.

DA SU

Kršeci pravila Međunarodnog prava sadržana u IV Ženevskoj konvenciji o zaštiti građanskih lica za vrijeme rata od 12. augusta 1949 godine, Dopunskog protokola o zaštiti žrtava nemedjunarodnih oružanih sukoba (Protokol II) uz navedenu konvenciju, za vrijeme oružanog sukoba u BiH, kao pripadnici vojske i policije RS-a, u drugoj polovini mjeseca septembra 1992 godine, na području mjesta Duljci, Ćukovi- Duliba i Orašac, općina Bihać, lišili života 25 civila Bošnjačke narodnosti, postupajući protivno članu 3. IV Ženevske konvencije st. 1. tačka a. u vezi sa čl. 4. st. 1. i 2. tačka a. Protokola II uz navedenu konvenciju, tako što su:

a) T. Z., B. Z., M. G. i B. Ž., zajedno

- dana 23.09.1992 godine, u jutarnjim satima, u zaseoku Mešići, selo Orašac, općina Bihać, naoružani automatskim puškama i obučeni u vojnim i policijskim uniformama, došli zajedno sa Tadić Svetkom (nedostupan državnim organima), pred kuću Mešić Ibrahima kako bi pronašli Mešić Šaćira, znajući da se isti nalazi kod njega i znajući da su prethodnu noć u Orašcu ubijani civili bošnjačke narodnosti i paljene njihove kuće, te nakon što je neko od osumnjičenih doživao Mešić Šaćira da izadje iz kuće, na vratima su se pojavili Mešić Safija i njen brat Mešić Šaćir, kada su osumnjičeni u namjeri da ih liše života, u iste ispucali više metaka, usljed čega je Mešić Safija rođena 1945. godine pala u unutrašnjost hodnika, te je od zadobivenih povreda preminula na licu mjesta, nakon čega je Mešić Šaćir uspio da

pobjegne u unutrašnjost prostorije u kojoj se nalazio prozor, da bi spas našao bježeći kroz prozor u pravcu zaseoka Lončić, osumnjičeni vidjevši da Šaćir bježi potrčali su za istim, pa kada su u voću, u blizini štale pronašli vlasnika kuće Mešić Ibrahima rođenog 1919 godine, u namjeri da ga liše života u istog ispucali više metaka od kojih povreda je isti preminuo na licu mjesta, pa kada im je Mešić Šaćir uspio da pobjegne, vratili su se nazad do ulaza u kuću, kako bi provjerili da se u kući ne nalazi još neko, da bi u unutrašnjost kuće ušli T. Z., B. Ž. i M. G. držeći u rukama svoje automatske puške sa uprtim cijevima ispred sebe, dok su Berga Zoran i Tadić Svetko ostali ispred kuće, držeći svoje automatske puške u rukama u pravcu kuće u koju su ušli navedeni, kojom prilikom je M. G., vidjevši da se u jednoj prostoriji na dva kauča, ispod pokrivača miču tijela, vičući „tu se krijete, majku vam j.... „ u namjeri da ih liši života ispucao više rafala u pravcu istih, kojom prilikom su lišeni života Hrnjica Mina rođena 1910. godine i Mešić Hava rođena 1922. godine, a potom zapalili kuću u kojoj su ostala tijela ubijenih žena.

b) T. J., T. Z., B. Z. i B. Ž., zajedno

- istog dana, 23.09.1992 godine, u vremenskom periodu od 16,00 -17,00 sati, u mjestu Duljci, općina Bihać, zajedno sa Tadić Đurom zv. Mrda, Tadić Svetkom (nedostupni državnim organima), Đurić Slobodanom i Đurić Gojkom (koji su se, nakon par dana od ovog događaja u porodičnoj svadji izmedju sebe poubijali), došli sa dva putnička motorna vozila do mjesta gdje su civili bošnjačke narodnosti sa područja naselja Ripač i Orašac, općina Bihać, radili na radnoj obavezi branja šljiva, određenoj od strane Ratnog predsjedništva „Srpske opštine Bihać“, da bi svi naoružani automatskim oružjem, obučeni u vojne i policijske uniforme i maskirani sa kapama i čarapama na glavi, prišli do civila, koji su te prilike sjedili ispred kuće Vojić Huseina, a neki od njih radili po okolnim voćnjacima, te u namjeri da ih liše života u iste ispucali više rafala iz automatskih pušaka, te kada su vidjeli da se neki od civila sakrivaju u štalu u blizini asfaltnog puta, na sjenik iste bacili bombu, a neke od civila ubadali nožem, kojom prilikom su lišili života: Nasufović Hasu rođen 1929 godine, Šahinović Bekira rođen 1940 godine, Šahinović Safiju rođenu 1945 godine, Šehić Hasniju rođenu 1949 godine, Džaferagić Ismetu rođenu 1956 godine, Šarić Zejnu rođenu 1954, Mujić Sadetu rođenu 1942 godine, Dupanović Muhu rođen 1934 godine, Dupanović Mehu rođen 1929 godine, Dupanović Agu rođen 1934, Rakić Šeru rođen 1929 godine, Šarić Husu rođen 1933 godine, Vojić Vahidu rođenu 1914 godine, Vojić Fatimu rođenu 1919 godine, Vojić Seniju rođenu 1947 godine, Vojić Aldinu rođena 1979 godine, Kolaković Sabiru rođenu 1962 godine i Šehić Safiju rođenu 1928 godine, a potom tijela ubijenih stavljali na hrpu i palili, dok su istog dana i na istom mjestu, u namjeri da liše života Hajrulahović Tahiru, koja se nalazila neposredno uz kuću Vojić Huseina u istu ispucali više metaka iz automatskih pušaka, kojom prilikom je ista zadobila teške tjelesne povrede sa trajnim i znatnim posljedicama, izraženim u vidu višestrukog preloma obje kosti podlaktice i povrede na lijevoj nadkoljenici, a koja se uspjela spasiti bježanjem u unutrašnjost kuće.

c) T. Z. i B. Ž. - zajedno

- kasnije istog dana, 23.09.1992. godine, u poslijepodnevnom satima, vraćajući se iz Duljaka, gdje su zajedno sa drugima učestvovali u ubistvima većeg broja civila, došli u zaseok Kosa- Rajnovci, općina Bihać, znajući da se u kući vlasništvo Kecman Miće, nalaze Alivuk Ramo rođen 1924 godine i njegova supruga Alivuk Kada rođena 1924 godine, koji

su od ranije bili u dobrim odnosima sa Kecman Mićom i kod kojeg su došli tražiti spas jer su se tih dana dešavala ubistva u Orašcu, osumnjičeni naoružani automatskim puškama i obučeni u policijske uniforme, iz kuće su izveli Alivuk Ramu i Alivuk Kadu tjerajući ih ispred sebe sa uprtim automatskim puškama, vičući "j... vas onaj ko vas krije", da bi ih doveli do asfaltnog puta gdje ih je sa vozilom čekao Glušica Nikola zv. Cia i lice po nadimku Buco iz R. Hrvatske (nedostupni državnim organima), te iste sa p.m.v. kojim je upravljao Glušica Nikola odveli na lokaciju zv. Duliba, gdje su zaustavili vozilo i iz vozila izveli Alivuk Ramu i Alivuk Kadu, te u namjeri da ih liše života, doveli do ruba provalije uz šumu, u blizini asfaltnog puta, naguravajući ih automatskim puškama, kada je jedan od njih iz automatske puške ispucao više rafala u navedena lica, koja su pogođena pala niza stranu, kojom prilikom je Alivuk Ramo zadobio strijelne rane lijevog kuka, lijeve nadlaktice i lijeve podkoljenice, a Alivuk Kada strijelne rane lijeve nadkoljenice i desne podkoljenice, od kojih povreda su preminuli na licu mjesta.

d) M. G. - sam

- krajem mjeseca septembra 1992 godine, u prijepodnevnim satima, u mjestu Lončić, selo Orašac, općina Bihać, u blizini stare kuće Laze Matijevića, znajući da se Mešić Šaćir nalazi u blizini te kuće i da traži pomoć, naoružan sa automatskom puškom u policijskoj uniformi zajedno sa rezervnim policajcem Kecman Miroslavom, otišao da pronadje Mešić Šaćira rođen 1953 godine, na koga je zajedno sa drugim licima pucao ranije dana 23.09.1992 godine u kući Mešić Ibrahima u zaseoku Mešići, gdje mu je isti pobjegao, pa kada ga je pronašao na jednoj livadi, vidjevši ga kako se bespomoćno drži odbočen na dva štapa, tražeći pomoć od njega, u namjeri da ga liši života u istog ispucao više metaka iz automatske puške od kojih povreda je Šaćir Mešić preminuo na licu mjesta.

Dakle, kršeći pravila međunarodnog prava za vrijeme rata u BiH izvršili ubistva i pokušaj ubistva civila.

Čime su:

- pod tačkama a, b i c, kao saizvršioc, a pod tačkom d kao izvršilac počinili krivično djelo - ratni zločin protiv civilnog stanovništva iz čl. 142. st.1. u vezi sa čl. 22. preuzetog KZ SFRJ.